

每週經課朗誦經文(巴克禮台語漢字)2014/03/16

共同經課 - 1

創世記十二章一節~四 a 節

1 耶和華對亞伯蘭講：「你著離開本地、本族、老父的家，去我所欲指示你的地。2 我欲互你成做大國。我欲賜福你，互你的名做大；你亦欲互人得著福氣。3 祝福你的，我欲賜福互in；咒詛你的，我欲責罰伊。地上萬族欲因爲你得著福氣。」4 亞伯蘭照耶和華吩咐的話就去；羅得亦及伊去。

共同經課 - 2

詩篇一百二十一篇

1 [上崎仔的詩。]我欲抬目向山；我的幫助對叨落來？2 我的幫助對耶和華來，伊是創造天地的。3 伊無欲互你的腳搖滯；保守你者的確無盹眠！4 看啊，保守以色列的，也無盹眠也無暈去。5 保守你者是耶和華；耶和華佇你的正旁做你的蔭影。6 日時，太陽無傷你；暝時，月亦袂害你。7 耶和華欲保守你，免受一切的災害；伊欲保守你的生命。8 你出你入，耶和華欲保守你，對此時直到永遠。

共同經課 - 3

羅馬書四章一節~五節，十三節~十七節

1 按呢，咱欲講咱肉體的祖亞伯拉罕有得著甚麼？2 因爲亞伯拉罕若對所行得著稱做義，就通誇口；總是對上帝本是無。3 因爲聖經講甚麼？「亞伯拉罕信上帝，就給伊算做義。」4 今見若做工的，伊的工錢無算是恩典，算是應該的；5 若是無做工的，獨獨信彼個稱不虔的人做義的，伊的信就給伊算做義。13 因爲所應允亞伯拉罕及伊的後裔做後嗣承接世間的，毋是對律法，是對信的義。14 因爲若屬律法的做後嗣，信就歸佇空空，應允也廢無。15 因爲律法是致到受氣；若無律法，就無犯著。16 所以是對信，通照恩典，欲互應允堅固佇眾後裔；毋若佇彼個屬律法的，也佇屬亞伯拉罕的信的。17 伊佇伊所信的上帝的面前做咱眾人的父，就是彼個互死人復活，叫許個無者那親像有者的上帝；照所記載講：「我設立你做多多邦國的父。」

共同經課 - 4

約翰福音三章一節~十七節

1 有一個法利賽人，名尼哥底某，是猶太人的官。2 暝時來就近耶穌，對伊講：「拉比，阮知你做先生是對上帝來的；因爲若毋是上帝及伊佇啲，就無人會行你所行諸個神蹟。」3 耶穌應伊講：「我實實給你講，人若無重頭生，就袂會看見上帝的國。」4 尼哥底某對伊講：「人已經老，怎樣會重頭生？豈會閣入老母的腹肚來生嗎？」5 耶穌應講：「我實實給你講，人若無對水對聖神來生，就袂會入上帝的國。6 對肉體生的是肉體；對神生的是神。7 我講：『恁的確著重頭生』，你莫得掠做奇怪。8 風出在意思來吹，你聽見伊的聲，毋知伊對叨落來，叨落去；見若對神生的，亦是按呢。」9 尼哥底某應伊講：「怎樣會按呢啊？」10 耶穌應伊講：「你做以色列的先生，也毋知這嗎？11 我實實給你講，阮是講阮所知的；干證阮所看見的；若是恁毋接納阮的干證。12 我給恁講地上的事，恁尙且毋信，若給恁講天頂的事，恁豈欲信？13 無人曾上天，只有佇天裡的人子，對天降落的若定。14 閣親像摩西舉起蛇佇曠野，人子亦的確著按呢受舉起，15 互見若信的人恁佇伊有永活。16 「因爲上帝將獨生的子賞賜世間，互見若信伊的人，袂沈淪，會得著永活，伊疼世間到按呢。17 因爲上帝差子入世間，毋是欲審判世間；是欲互世間對伊得著救。」